

La ARLeF e dediche il Lunari 2020 ai mûts di dî des 12 minorancis dal Stât talian

Al à il formât di taule, al celebre i 20 agns de leç 482/99 e al è in distribuzion gratuite li de sede de Agenzie.

Ai **25 di Novembar dal 1999**, cu la aprovazion de **Leç n. 482 “Normis in materie di tutele des minorancis linguistichis storichis”**, la Republiche taliane e ricognosseve **dodis minorancis linguistichis storichis** che a fevelin idiomis diviers da talian. Si metevin in vore doi principis fundamentâi, stabilîts de Costituzion midiant l’art. 3 “Ducj i citadins a àn dignitât sociâl compagne e a son avuâi denant de leç, cence distinzion di ses, di raze, di lenghe, di religjon, di opinions politichis, di cundizions personâls e sociâls”, e l’art. 6 “La Republiche e tutele cun normis di pueste lis minorancis linguistichis”. E jere di fat la scree di un percors impuartant di valorizazion e di tutele che chest an al finîs 20 agns. Par celebrâ dut chest, la ARLeF - Agenzie Regionâl pe Lenghe Furlane, e à ideât il Lunari 2020, in version di taule, tant che un viaç che, mês par mês, al travierse in maniere simboliche la penisule taliane des minorancis, ricuardant il lôr valôr culturâl e **lis lôr lenghis**, custodis principâls de identitât e dal sens di partignince di un popul.

Lis 12 lenghis a son, lis ricuardin, l’albanês fevelât di 100.000 personis in Calabrie, Sicilie, Pulie, Basilicade, Campanie, Molîs e Abruç; il catalan cui siei 7.500 fevelants cirche in Sardegne; il cravuat dal Molîs, cuntune popolazion di 1000 unitâts; il francês pandût in Val di Aoste e Piemont, cun passe 95.000 locutôrs; il francoprovençâl presint sedi in Val di Aoste che in Piemont e in Pulie, fevelât di 70.000 personis; il grêc de Pulie e de Calabrie, cun passe 10.000 locutôrs; il ladin dal Trentin – Sud Tirôl e dal Venit, che al conte 31.000 fevelants; l’ocitan presint in Piemont, Ligurie e Calabrie e fevelât di 100.000 personis; il sart che in Sardegne al è la lenghe doprade di un milion di personis; e infin, lis trê minorancis presintis te nestre region: il sloven che in Friûl – Vignesie Julie al conte 61.000 locutôrs cirche; il todesc che si cjate in Val di Aoste, Piemont, Trentin – Sud Tirôl, Venit e Friûl e fevelât di 361.000 locutôrs; e, clâr, il furlan, cui siei passe 610.000 locutôrs in 173 comuns dal Friûl e in trê dal Venit.

Tal Lunari, ogni minorance e je rindude in maniere simboliche cuntune detule segnalade ae ARLeF de stesse comunitât tant che la plui rappresentative e identificative, proponût inte lenghe originâl cun zontadis lis traduzioni par furlan e par talian.

Stampât intun numar limitât di copiis, il Lunari **al è in distribuzion gratuite te sede de ARLeF (in vie della Prefettura 13 a Udin), fin che a'nd è.**

Udin, ai 6 di Dicembar dal 2019

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<